



Vedtekter

SIST REVIDERT PÅ RAUDTS LANDSMØTE 2023





§ 1 Namn og føremål

1. Partiet heiter Rødt/Raudt. Dei nordsamiske, lulesamiske og sørsamiske namna på partiet er Ruoksat, Ruoppsat og Røøpses. Det kvenske namnet er Punaiset. På romani er namnet Lollo.
2. Raudt driv politisk arbeid på grunnlag av programma og vedtektene til partiet.

§ 2 Medlemene sine rettar og plikter

1. Alle som godtek programma og vedtektene til Raudt og som betaler kontingenten, vert medlemmer i partiet.
2. Ein ny medlem har rett til å få ei innføring i kva partiet står for.
3. Ein må ha vore medlem i tre veker og ha betalt kontingenten det aktuelle året, før ein får røysterett på landsmøtet, årsmøte og nominasjonsmøte, og før ein kan røyste ved val av delegatar til slike møte.
4. Medlemene har rett til – gjennom eit lokallag – å røyste ved val til og stille som kandidat til tillitsvern i partiet.
5. Medlemene har rett til å få rapportar om arbeidet til partileiinga og om utviklinga i partiet som heilskap.
6. Partiet skal leggje til rette for at medlemene kan arbeide aktivt i lokallag. Medlemene bør om mogleg delta i lokallagsarbeidet.
7. Ein medlem i Raudt kan ikkje samtidig vere medlem i eit anna norsk politisk parti, eller stille til val på vallister som konkurrerer med Raudt-listar.
8. Ein medlem i Raudt kan ikkje tilhøyre politiske foreiningar eller organisasjonar som motarbeider Raudt.
9. Medlemmer i Raudt som har moglegheit til det, bør vere fagorganisert.

§ 3 Kontingent og økonomiske forhold

1. Landsstyret fastset kontingentsatsar og reglar for innbetaling. Satsane skal graderast etter inntekt.
2. Kontingentinntektene vert fordelte mellom partiet sentralt, lokallaga og fylkesorganisasjonane. Landsstyret fastset fordelinga.
3. All offentleg partistønad til Raudt er partiet sin kollektive eigedom:
 - a) Lokallag og fylkeslag beheld høvesvis kommunale og fylkeskommunale løyvingar.
 - b) Statleg støtte skal innbetalast til partiet sentralt.
 - c) Medlemmer som får utbetalt godtgjersle som folkevalde betaler partiskatt etter retningsliner vedtekne av landsstyret.
 - d) Landsstyret fordeler inntektene frå innbetalt godtgjersle.



§ 4 Organisasjonsprinsipp

1. Raudt skal vere ein open organisasjon prega av gjensidig respekt, der usemje vert verdsett og politikk vert utvikla i ein arbeidsfellesskap. Lokallag og medlemmer skal gjere usemje kjent i partiet for å bidra til politisk utvikling og eit reelt partidemokrati.
2. Leiinga på alle nivå har eit særskilt ansvar for at mindretalssyn vert kjente og reelt handsama i partiet.
3. Ved usemje om kva standpunkt partiet skal ta i saker som er til handsaming i folkevalde organ, avgjer partistyret på det aktuelle nivået. Dei folkevalde representantane har rett til å delta i drøftingane.
4. Om ei sak gjeld til dømes to kommunar, skal partiorganisasjonen både stader samrå seg og freiste å kome til eit sams standpunkt.
5. Ved val til tillitsverv skal ein arbeide for rotasjon. Dette gjeld både lokalt og sentralt, ved val til partiet sine eigne organ og ved nominasjon til folkevalde verv.
6. Medlemmer som vert valde som delegatar til møte i partiet kan ikkje bindast til korleis ein skal røyste.
7. Det same organet som har valt ein tillitsvald kan ta frå personen vervet. Berre lovleg innkalla ordinære eller ekstraordinære møte kan fatte slike vedtak. Den tillitsvalte skal verte gjort kjent med saka og få høve til å uttale seg til dei som innstiller og avgjer saka.

§ 5 Lokallag

1. Lokallaget er den viktigaste eininga i partiorganisasjonen. Lokallaga gjer det konkrete politiske arbeidet, diskuterer og utviklar ny politikk og vel representantar til dei andre organa i partiet.
2. Lokallag kan organiserast kring bustad, arbeidsstad, bransje eller interessefelt. Alle medlemmer høyrer til eitt lokallag.
3. Eit lokallag skal ha styre med minst leiar og økonomiansvarleg.
4. Årsmøte i lokallag skal vere kvart år innan utgangen av februar. Det skal minst handsame styret si årsmelding, rekneskap og årsplan og velje styre. Årsmøtet skal varslast seinast ein månad før, og sakspapira skal vere hos medlemene seinast ei veke før.
5. Ekstraordinært årsmøte i eit lokallag skal haldast om ein tredel av medlemene eller ein tredel av styret krev det. Fylkesstyret kan også innkalle til ekstraordinært årsmøte i eit lokallag.
6. Lokallag skal sende årsmøteprotokollen til partileiinga.
7. Medlemsmøte i lokallaget skal gje medlemene rom for å aktivt delta i partidemokratiet og bruke medlemsrettane sine. Styret har ansvar for å følgje opp vedtaka frå medlemsmøtet.



8. Fylkes- eller landsstyret kan oppløyse eller slå saman lokallag når det ikkje lenger er medlemsgrunnlag for å oppretthalde dei. Medlemene i lokallaget har rett til å uttale seg på førehand. Fylkes- eller landsstyret vedtek òg kva som skal gjerast med eignedomen til laget.

§ 6 Kommuneorganisasjon

1. Der eitt lokallag aleine dekker éin eller fleire kommunar representerer dette lokallaget partiet i kommunen.
2. I kommunar med fleire lokallag skal det vere eit styre som koordinerer arbeidet. Om det høver best, kan eit slikt samordningsstyre dekke fleire kommunar. Dette styret representerer partiet i kommunen. Valmåten vert fastsett i lokal vedtekt. Vedtekta vert første gong fastsett på felles medlemsmøte.

§ 7 Fylkeslag og fylkesdelslag

1. Fylkeslag er partiet si organisering innanfor det enkelte fylket.
2. Styret skal koordinere lokallag og enkeltmedlemmer i fylket til felles handling, skoloring og utvikling av politikk. Styret skal følgje opp medlemmer som står utanfor lokallag, og bygge partiet i fylket.
3. Eit fylkeslag kan fastsette i lokal vedtekt at fylkeslaget er delt inn i fylkesdelslag og overføre oppgåver til desse. I så fall skal det vere eit styre som samordnar arbeidet og representerer partiet i fylket. Valmåten for styret vert fastsett i lokal vedtekt.
4. Eit fylkeslag kan ikkje slå saman fleire fylkesdelslag utan at kvart av dei samtykker til det.
5. Der det finst fylkesdelslag, gjeld dei etterfølgjande punkta i denne paragrafen kvart av fylkesdelslaga i staden for fylkeslaget.
6. Styret skal minst bestå av leiar, nestleiar og økonomiansvarleg. Leiar eller nestleiar skal vere kvinne. Styret representerer partiet i fylket.
7. Styret godkjenner nye lokallag i fylket og rapporterer desse inn til partikontoret.
8. Årsmøte i fylkesorganisasjonane skal vere kvart år innan utgangen av mars. Til årsmøtet vel lokallaga delegatar etter medlemstal. Anna ordning kan fastsetjast i lokal vedtekt. Dato for årsmøtet og delegatnøkkelen vert fastsett av styret og skal gjerast kjent minst åtte veker før. Lokallag kan klage på delegatnøkkelen innan to veker etter kunngjeringa. Styret må i så fall ta opp delegatnøkkelen til ny handsaming. Sakspapira til årsmøtet skal vere hos lokallaga seinast to veker før møtet. Årsmøtet skal minst handsame styret si årsmelding, revidert rekneskap, framlegg til årsplan og velje styre.



9. I landsmøteår foreslår fylkeslaga kandidatar til landsstyret i tråd med §13 i vedtektene. Fylkeslaga kan gjere dette i årsmøte, medlemsmøte eller delegatmøte. Valkomiteen set saman innstillinga si basert på dei forslaga som er sendt inn frå fylkeslaga.
10. Ekstraordinært årsmøte i eit fylke skal haldast om ein tredel av lokallaga eller ein tredel av styret krev det. Dersom styret ikkje oppfyller pliktene sine etter vedtektene, kan landsstyret innkalle til ekstraordinært årsmøte i fylkeslaget.
11. Styret skal sende årsmøteprotokollen inn til partikontoret.

§ 8 Landsmøtet

1. Landsmøtet er det høgste organet i Raudt. Det skal haldast innan utgangen av mai minst annakvart år.
2. Innkalling, framlegg til dagsorden, delegatnøkkel og oversyn over forslagsfrister for landsmøtet skal vere ute i lokallaga minst 12 veker før møtet. Sakspapir irekna alle innsendte framlegg skal vere sendt delegatane seinast tre veker før landsmøtet.
3. Landsmøtet skal minst handsame melding og reviderte rekneskap for perioden og handlingsplan og retningsliner for budsjett for komande periode. Landsmøtet skal vidare velje partileiar, inntil 2 nestleiar(ar), partisekretær, økonomiansvarleg, fagleg leiar, landsstyre og inntil 10 andre medlemmer i sentralstyre, samt revisor(ar).
4. For at eit lokallag skal kunne sende delegatar på landsmøtet, må det vere oppretta og godkjent innan 31. desember året før. Lokallag godkjent seinare skal få sende observatør til møtet.
5. Berre lokallag kan velje delegatar til landsmøtet. Landsstyret vedtek delegatnøkkel. Alle lokallag som har tre medlemmer eller meir, skal ha minst ein delegat. To eller fleire lokallag i geografisk nærleik kan gå saman om å velje delegatar.
6. Raud Ungdom vel sjølv delegatar til landsmøtet, og får like mange delegatar frå kvart fylke som om Raud Ungdom sine medlemmer i fylket hadde vore eit lokallag i Raudt.
7. Delegatane vert valde med alminneleg fleirtal på medlemsmøte, der datoen er varsla minst tre veker før.
8. Berre valde delegatar har røysterett på landsmøtet. Landsstyret har tale- og forslagsrett.
9. Ekstraordinært landsmøte skal haldast når ein tredel av lokallaga krev det eller når fylkesorganisasjonar/ lokallag som representerer minst ein tredel av medlemene, krev det.



§ 9 Landsstyret

1. Landsstyret er det høgaste organet i Raudt mellom landsmøta, og leier arbeidet mellom landsmøta innanfor rammer som går fram av vedtektene, programma og landsmøtevedtak.
2. Landsstyret er samansett av arbeidsutvalet, sentralstyret, samisk representant, ein representant utpekt av Raudt Ungdom og ein representant frå kvar stortingskrets. I tillegg får stortingskretsar med mange medlemmer fleire representantar etter følgjande nøkkel: ein tilleggsrepresentant for kvar heile 1/15 av medlemmene i Raudt som er medlem av lokallag i stortingskretsen.
3. Landsstyret skal møtast minst tre gonger i året. Minst halvparten av medlemmene i landsstyret må vere til stades for at eit LS-møte skal vere vedtaksdyktig.
4. Landsstyret kan utnemne utval som får politisk og praktisk ansvar for særskilde felt.
5. Medlemene i landsstyret har ansvar for å hente inn syn på saker som skal opp i landsstyret frå fylket sitt, og for å bidra til å gjere vedtak frå landsstyret kjent og sette dei ut i livet.
6. Landsstyret skal følgje opp dei lokale ledda i partiet i forkant og etterkant av landsstyremøte for å sikre forankring og oppfølging av sentrale vedtak.
7. Landsstyret kan delegerere saker til lågare nivå og kan avgjere kva for organ som skal følgje opp vedtak i landsstyret.

Landsstyret skal mellom anna:

- vedta budsjett og godkjenne rekneskap
- utnemne utval som får politisk og praktisk ansvar for særskilde felt og vedta mandat og økonomiske rammer for arbeidet til utvala
- vedta politikk i saker som ikkje er dekte av arbeidsprogrammet
- fastsette kontingentsatsar og reglar for innbetaling
- vedta retningslinjer for innbetaling av partiskatt og fritak
- godkjenne oppretting av fylkesorganisasjonar
- godkjenne oppretting av ei samisk organisering i Raudt
- vedta talet på delegatar til landsmøtet og delegatnøkkel for desse
- vedta fordelinga av observatørar til landsmøtet
- fastsette reglar om nominasjon til sametingsvalet
- fastsette ansvarsområdet til sentralstyret og arbeidsutvalet
- fastsette standardvedtekter for lokale og regionale organisasjonsledd
- vedta retningslinjer for handsaming av saker med seksuell trakassering
- vedta retningslinjer for handsaming av konfliktsaker



§ 10 Sentralstyret

1. Når landsstyret ikkje er samla, er sentralstyret det høgste organet i Raudt. Sentralstyret leier det daglege arbeidet til organisasjonen i tråd med retningsliner frå landsmøtet og landsstyret, og skal sjå til at vedtaka frå landsmøtet og landsstyret vert gjennomførte.
2. Sentralstyret er sett saman av arbeidsutvalet og representantar valt av landsmøtet. Minst 2/3 av medlemene i sentralstyret må vere til stades for at eit sentralstyremøte skal vere vedtaksdyktig.
3. Sentralstyret kan delegere saker til lågare nivå og kan avgjere kva for organ som skal følgje opp vedtak i sentralstyret.
4. Sentralstyret er det utøvande organet i partiet etter partilova.
5. Landsstyret fastset elles ansvarsområda til sentralstyret.

§ 11 Arbeidsutvalet

1. Arbeidsutvalet er den daglege leiinga i partiet og leier arbeidet mellom sentralstyremøta. Arbeidsutvalet innstiller saker til sentralstyret.
2. Arbeidsutvalet er sett saman av partileiar, nestleiar(ar), partisekretær, økonomiansvarleg og fagleg leiar. Leiaren i Raud Ungdom har møterett med røysterett i arbeidsutvalet.
3. Landsstyret fastset elles ansvarsområda til arbeidsutvalet.

§ 12 Nominasjonar

1. Når det skal stillast lister ved val til kommunestyre, skal det haldast nominasjonsmøte med røysterett for alle medlemmer som er busett i kommunen. I kommunar med fleire lokallag, kan ein fastsette i lokal vedtekt at nominasjonen i staden skal skje på nominasjonsmøte med delegatar frå lokallaga i kommunen. Nominasjonsmøtet kan delegere ferdigstilling av lista til styret i kommunen. Punktet gjeld også for stortingslista for Oslo.
2. Dersom det er direkte val til bydelsutval eller liknande, skal det gå fram av lokal vedtekt korleis nominasjonen skjer.
3. Når det elles skal stillast lister ved val til Stortinget eller fylkesting skjer nominasjonen på nominasjonsmøte med delegatar frå lokallaga i valdistriktet. Når det skal stillast lister i fleire valdistrikt i same fylke, skal det vere separate nominasjonsmøte, der berre delegatar frå valdistriktet har røysterett. Delegatnøkkelen vert fastsett i lokal vedtekt. Ferdigstilling av lista kan delegerast til samordningsstyret når det gjeld fylkestingsval, og til fylkestyret når det gjeld stortingsval så lenge dei gamle stortingsvaldistrikta gjeld.



§ 13 Representasjon

1. I alle organ innanfor Raudt, ved val av delegatar og ved nominasjon til Raudt sine vallister skal det vere minst like mange kvinner som menn. For å sikre kvinner høgt opp på lister, bør minst annankvar kandidat vere kvinne.
2. Lokallag kan få innvilga unntak frå punkt 1 av fylkesstyret.
3. Ein skal freiste å ha ein høg arbeidarandel i alle organ.
4. Ein skal freiste å spegle mangfaldet i arbeidarklassen i organ og på vallister.
5. I skriftleg tilfang frå partiet sentralt (papir og nett) skal ein freiste å ha ein høg nynorskandel. Landsstyret skal kvart år vurdere situasjonen på feltet og drøfte kva tiltak som trengst. Det skal finnast oppdatert informasjonsmaterie-ll på samisk.

§ 14 Suspensjon og eksklusjon

1. Medlem som i særleg grad skadar eller motarbeider Raudt eller bryt vedtektene, kan ekskluderast. Medan undersøking i saka skjer, kan medlem-skap eller verv suspenderast.
2. Eksklusjon krev kvalifisert fleirtal, $2/3$ av dei røysteføre. Eksklusjon og suspensjon kan vedtakast av sentralstyret.
3. Ein ekskludert medlem kan anke avgjerda til landsstyret. I landsstyret krevjast og $2/3$ fleirtal av dei røysteføre for at eit vedtak skal verte gjeldande
4. Retningslinjer for behandling av eksklusjons- og suspensjonssakar vedtakast av landsstyret. Retningslinene skal ivareta retten til kontradiksjon og ha tydelege saksbehandlingsregler.
5. Landsstyret vedtek egne retningslinjer for handsaming av saker med seksuell trakassering. Landsstyret vel for kvar periode eit handsamingsutval for slike saker som innstiller overfor sentralstyret.
6. Landsstyret vedtek egne retningslinjer for handsaming av konfliktsaker.

§ 15 Rusmiddel

Møte i regi av Raudt skal vere rusgiftfrie.

§16 Ungdomsorganisasjonen

1. Raud Ungdom er ungdomsorganisasjonen til Raudt.
2. Raud Ungdom har rett på delegatar på Raudt sitt landsmøte jf. § 8.
3. I fylket og på felt der det finst parallell organisering, skal Raud Ungdom inviterast til samarbeid med Raudt. Der det finst lokalt eller fylkesvist ledd av ungdomsorganisasjonen, har dette rett til ein representant i styret på det tilsvarande nivået i Raudt.
4. Raud Ungdom sine representantar i Raudts organ har røysterett i desse.



§ 17 Oppløysing

1. Framlegg om å oppløyse Raudt eller slå partiet saman med ein annan organisasjon skal handsamast på to landsmøte med minst tre og høgst seks månaders mellomrom. Det første av desse skal vere eit ordinært landsmøte, og her krevst det 2/3 fleirtal for å gå vidare i prosessen. Det andre er eit ekstraordinært landsmøte. Dette stadfester eventuelt vedtaket om oppløysing eller samanslåing med alminneleg fleirtal. Samstundes vedtek dette landsmøtet kva som skal gjerast med partiet sin eigedom.
2. Framlegg om oppløysing kan berre kome frå organisasjonsledd i partiet eller landsstyret. Det må vere innkome til partikontoret seinast 31. desember året før landsmøtet som først skal handsame det.

§ 18 Vedtekter og vedtak

1. Vedtak i Raudt sine organ skal skje med alminneleg fleirtal, om ikkje vedtektene seier noko anna. Alminneleg fleirtal er fleirtal av dei avlagde røystene, utan å telle med blanke eller avhaldande røyster.
2. Ved røysteliskap fell forslaget. Ved røysteliskap ved personval vert valet avgjort ved loddkast.
3. Om det er ulike tolkingar av vedtektene, gjeld sentralstyret si forståing. Denne kan ankast inn for landsstyret, som skal handsame saka ved første høve. Landsstyret si avgjerd kan ankast inn for landsmøtet.
4. Vedtektene er juridisk bindande i tvistar som gjeld Raudt sin eigedom.
5. Desse vedtektene kan berre endrast på landsmøte. Endring krev kvalifisert fleirtal, 2/3 av dei med røysterett på landsmøtet. Frist for å fremje forslag til endring av vedtektene er fire veker før landsmøtet tek til. Landsmøtet kan berre gjere endringar som heng direkte saman med framlegg som er sendt ut på førehand. Om ikkje landsmøtet vedtek noko anna, trer vedtektsendringar i kraft straks.
6. Landsstyret fastset standardvedtekter for lokale og regionale organisasjonsledd i tillegg til det som følgjer av desse vedtektene. Lokale og regionale organisasjonsledd kan likevel velje å utarbeide eigne vedtekter. Desse må ikkje bryte med dei sentrale vedtektene og skal godkjennast av landsstyret.

8

8

3

S